

四庫全書

史部

欽定四庫全書

蜀中廣記卷八

明 曹學佺 撰

名勝記第八

川西道

成都府

金堂縣

水經註云新都縣有金臺山水通於巴漢以水出金沙

因以名山蜀記云金泉縣古有金船沈江之東岸銳底
民於水中往往見之矣 寰宇記云縣即漢處士段翳
宅也輿地碑目云段翳宅治內天慶觀是有段隱居李
真人二像碑字磨滅不可讀又云如舜禪師塔銘在金
堂龍槐院唐節度使杜悰撰文 宋之問送楊六望赴
金水詩借問梁山道嶽嵒幾萬重遙州刀作路絕壁劍
為峰惜別路窮此留歡意不從憂來生白髮時晚愛青
松勿以西南遠夷歌寢盛容台階有高位寧復久臨卽

宋勾龍行父送孫太冲詩金淵春三月桃李照城郭石峽賴鯉
魚時時醉賓幕金淵志云懷安最爾國而有雲峰月峽之勝
山之雄峙從梁劍而來江水洪深自壩灌洛而至晁公武作雨
零堂記云堂依雲麓而中江縈之氣象葱鬱巖壑洲渚之美映
帶左右矣按中江在軍西北源從漢州彌牟洛水岷橋等三
水會為一江志云東十二里曰前河即彌牟水又三里曰後河
即雒水也碑目云有幽州刺史牂柯太守漢張子陽墓在沿
江五里許其碑表載順帝永建四年造又云放生記誓

文唐太和二年令狐紉撰亦在中江岸上 圖經懷安
軍縣二而鎮九以縣而言金堂為大以鎮而言古城為
富諺謂軍不如縣縣不如鎮舊縣在峽口距東南四十
里鎮在北一里下為古城河水由灌子灘入斜潭也

志云峽口相傳鼉冷所鑿又云金灌口東枕雲頂南披
峽口水出山下如岷江之狀上有李冰祠金川在其下
流稍寬平處又云金灌口之東有七織溪白沙清流文
理如織又有柳溪在舊縣南七里常有柳葉在穴中出

華陽國志李冰導洛通山洛水或出瀑口經什邡郫別
江會新都大渡志云東南十里有大度鄉漢書新都王
恠有陰騭署大度亭長初到日有馬與繡被馳至後為
郫令行至繁亭有鬼夜見稱其夫為涪令之官過此全
家見殺召遊徼按之悉伏辜而還其喪時人為之謠曰
信哉少林世為過飛被走馬與鬼語有廟在山麓 志
云北十五里昌利山有石室三門容數十人俗呼為三
龍門碑目云唐昌利山有延祥觀碑開元中金堂尉沛

國武捷撰 寰宇記云銅盤山在西北二十里北接雒
縣南接新都山形如盤洛水彌牟水毗橋水經此山下
合中江也 名山志云金堂三學山乃漢州北山一名
雲頂一名石城亦名棲賢開照其實一山也志云東三
十里三學山李八百三度學仙於此故亦名棲賢其下
隘口壁立千仞惟一路可通人騎謂之三學隘寰宇記
云雲頂山舊名石城山其狀如城在縣西十五里頂上
平可十畝有神泉方丈澄清如照雲霞常興唐天寶六載

改為雲頂山西幸略云唐明皇至劍門山神見形迎駕
稱姓李氏後陟武擔東臺遠望祥雲紫氣盤結空界問
左右曰此何處對曰石城山乃悟山神扈衛之意遂改
雲頂為慈雲焉高僧傳唐開元年鑑源禪師於此山講
華嚴感聖燈現菩薩放光大松林後有寺額篆書三學
字其山四方面各三十里因謂之開照山矣勝覽云三
學山有佛迹石理堅潤瑩白如玉非世間槌琢所能又
有碧玉佛龕藕絲袈裟錦字心經貝葉金字涅槃經寺

前後檜栢皆隋唐故物又有飛石乃自雲頂飛來先是
寺有楠樹已枯石離而為二有王頭陀語曰五百年後
寺當廢若楠再生石再合然後復興果如其言碑目云
王頭陀塔銘在雲頂塔院貞元十五年薛倓撰又云三
學山飛石記邑宰張西撰又云支提石塔記在三學山
唐節度使段文昌撰又云鸚鵡舍利塔記在三學山韋
臯撰又云李義山為八戒和尚謝復三學精舍表略云
三學山夜有神燈朝明佛足風飄雨濕且無金燼落時

薛剝苔侵尚有寶花承處又云杜光庭功德記在三學
山 隋僧智炫遊三學山詩秀嶺接重烟巖岑上半天
絕巖低更舉危峰斷復連側石傾斜澗迴流瀉曲泉野
紅知草凍春來鳥自傳樹錦無機織猿鳴詎假弦葉密
風難度枝疎影易穿抱裘依閒沼策杖戲荒田遊心清
漢表置想白雲邊榮名非我顧息意且蕭然唐王勃遊
梵宇三學寺詩杏閣披青磴瑤臺控紫岑葉齊山路狹
花積野壇深蘿幌棲禪影松門聽梵音遽忻陪妙躅延

賞滌煩襟薛能自廣漢遊三學山詩殘陽終日望棲賢
歸路携家得訪禪世缺一來因薄命雨留三宿是前緣
詩題不忍離巖下屐齒難忘在水邊猿鳥可知僧可會
此心常似有香烟又題開照寺云盡室徧相將中方上
下方夜深楠樹遠春氣栢林香聖跡留岩險靈燈出混
茫何因將慧劍割愛事空王偽蜀太后徐氏漢州三學
山看聖燈詩虔禱遊靈境元妃夙志同名香焚靜夜銀
燭炫遼空泉漱雲根月鐘敲樹杪風印金標聖迹飛石

頌神功偶望天涯極臨看日脚紅猿來齋室上僧集講
筵中頓覺超三界渾疑證六通願成修偃事社稷保延
洪太妃徐氏和云聖燈千萬炬旋向碧雲生細雨漉不
暗好風吹更明磬敲金地響僧唱梵天聲若說無心法
此光如有情宋王雍題雲頂山詩五色琉璃白晝寒當
年佛脚印旃檀藕絲織出三衣妙貝葉經傳一偈難夜
看聖燈紅菡萏曉驚飛石碧琅玕更聞鸚鵡因緣塔
八十山僧試說看

簡州

華陽國志犍為郡牛鞞縣受新都江去郡三百里漢元
鼎置相陽明鹽井即牛鞞井也南齊牛鞞戍設在州城
西岸即古簡縣址三國志姜維聞鍾會入犯表守陽
安關關在西南三里上流井依山為之舊陽安縣及今陽
安驛本此名水經注云晉羅尚乘牛鞞水東征李雄發自
陽安關矣九州要記陽安縣南七十步有赤水如絳
源出隆州今治西二里絳溪是也溪上龍門洞有石如

龍壁上龍門二字州人許奕書傍刻柳子厚鉤鉅潭諸
記乃宋臨歐陽詢書又云陽安有雁水源出廣漢曹榮
諲詩城下水流金雁月亭中人弄玉絃琴是也雁赤二
水之間有江月樓薛濤江月樓詩凭欄却憶騎鯨客把
酒臨風手自招細雨聲中停去馬夕陽影裏亂鳴蜩
方輿勝覽簡郡設廳棟宇盡唐制梁上題寶厯元年刺
史張炎建抵嘉定之壬午巳二百九十有八年矣碑目郡
守壁記名氏始唐貞觀十三年見劉左史折柳亭記亭

在朝天門外舊名情盡橋刺史雍陶詩從來只說情難
盡何事教名情盡橋自此改名為折柳任教離恨一條
條方輿云紹興中建西州道院在州治南黎持記云
陽安鄰於會府而有江山之勝處於高仰而有魚稻之
饒民事獄訟比之旁郡十無一二凡隱於吏者樂趨焉
人目之為西州道院又云望湖樓在州治道院之後湖
光山色交相輝映輕舟小艇時時撐出柳陰中不謂重
岡疊嶂間乃有瀟湘茗雪之景也志云簡縣忠清門

外有唐太子誦書記功碑甚巨元和二年朝議郎使持節簡州諸軍事守簡州刺史李維勒石碑目云南康郡王紀功碑乃憲宗撰文太子誦書貞元十三年建原在龍興寺宋天聖五年移在州衙門外頒春亭側又云在郡市心居民室下紹興丁巳穴土見碑石太守命工取之重撤民屋不果上錄其文乃唐御製紀功碑銘并序皇太子書碑面殘缺不全惟碑陰乃開成元年臯從孫鋌為本州守日紀述其文俱全遂覆之按此碑已取出

今存志云城內雙市街有叢桂樓以宋紹興中朱熹
同榜李繳如李進修范時中袁炎牟子正俱州人也太
守郭由中為樓記方與勝覽景德觀在郡南一里山
谷集云簡池覺範道人城東道友也住景德院其家風
十二時似趙州東院西池種竹兩枝於宴坐軒中山谷
老農作頌曰往在江南住竹山道人兩歲三來訪聽風
聽雨看成龍牛羊折角入朝餉簡州城東刮地寒手種
檀藥三兩竿竹成要作無孔笛若有靈龜一任鑽魯直

又有題其也足軒詩詳詩話中 圖經簡有四岩東西
南北也三溪東南前也三池柳鳳賴簡也劉涇云三溪
號一郡之勝前溪在陽安治後亦稱後溪文同後溪晚
步詩云陰陰芳樹暗迴堤路入蒙籠轉野溪澤雉應媒
高復下林鷗引子歇還啼青蒲宛宛全淹水紫竹斑斑
半出泥倚杖風前感時節亂烟斜日一蟬嘶 巨濟又
云南溪壽昌寺前水是也由南溪沿隄一里許為東溪
李良臣詩簡州何處景最佳東溪清絕人所誇溪上有

碧波亭宋姚萼詩賴簡池臺兩蜀誇東溪別是一仙家
令人却憶康王谷坐看珠簾濺雨花志云劉文節墓及
讀書樓俱在東溪上今東林寺是其樓址一名東溪菴
志云柳池折柳橋下水也鳳池在治南三里水自北
一里鳳翅山來賴簡山接金堂山郡池名皆因之勝
覽云東山在東江之外州治之左志云在城東五里岩
高數丈刻東岩二大字有東巖院智通禪師卓菴處地
居兩山之間溪流其中下有懸溜清音不絕旁有洞又

有古栢大可二十圍為一郡之望刹也志云即天王講
寺貞元初施頭陀趺近巖有雙牙山兩石對峙如牙
上有井及石箱人見兩金鵝其側書浴於井夜棲於箱
蜀志補罅云西巖在簡州湧泉鎮有石刻大悲像光
相屢現志云在治西五里巖洞深三丈五尺濶如之洞
門刻西巖二字宋嘉定甲子王武卿結菴於此題名

近巖有石柱山孤高獨立上有石像百餘石室數間有
仙人楊氏養丹爐鼎尚存登其巔可望逍遙山勝覽

云逍遙洞在玄都山去城三十里景德間有楊用晦者
隱居此山其上有層崖命工發之得東西二室西室後
刻二竈若養丹之所又鑿二窟中可坐五七人東西二
壁鐫二孔雀二神人有漢安元年四月十八日會仙友
十二字漢隸也今存按用晦簡池人有仕才能詩任心
自適不求當世樂隱洞中時太原王載京兆金惟吉南
陽鄧曦度杜審嗣劉旻遠來尋訪刻詩壁間 志云
南巖在治南一里有洞深三丈闊二丈五尺方輿勝

覽南巖有光孝寺前敞飛閣盡覽江山之勝左有洞可容數十人即淳風洞也石刻無名氏詩烟飛嵐翠撲衣袈落日牛羊下巉頭莫道山生意薄江邊桃李自風流簡州學記李淳風生於州之乾封鎮有故宅及墓按今銅鐘寺即報恩光孝寺舊址宋孝宗隆興二年陽安尉歐陽獬建䟽請衡山和尚住持寺前高敞有會勝亭趙抃知益州時寺僧有能琴者見知於公作琴軒詩贈之云輟飲支筇會勝亭溪山佳處古琴橫憑君傾耳殷

勤聽一弄清風四座生諫議大夫張方詩早向溪山得
趣深建亭今復寄餘音紛紛塵市無閒地獨有斯人物
外尋志云北巖在治北二里洞深三丈闊五尺有坐
榻茶竈傍開石牕牕下有泉清冷不竭有寺舊名白馬
院開元中馬祖建倚壁有丈六金身無名氏詩云一帶
江烟半倚巖檻前時眺黑龍潭低昂竹影踈明月屈曲
松枝拂像龕樹老硬根穿石罅草生嬾葉入禪菴西來
白馬無踪跡寒鵲昏鴉暮景含碑目云院有唐碑其歲

月乃大厯時重修石壁刻云郡守潼川王武卿攜家渡江過唐氏園偶泛舟泊山下登劉氏江閣因上北巖禮大佛開禧改元二月十有三日書 近巖有洞曰朝陽深三丈餘高丈有八尺廣一丈內有石牀額篆石室二字蓋昔人煉丹之所 志云四巖附郭之勝也其稍遠者有玉華池天光觀覺林寺又遠則為分棟長松諸山 寰宇記陽安縣北二十里玉女靈山東北有泉西北兩岸各有懸崖腹有石乳房一十七眼狀如人乳流下

土人呼為玉華池每三月上巳日有乞子者漉得石即
是男瓦即是女自古有驗山為仙人李八百修煉處

勝覽云李八百居棲賢觀一名天光觀碑目云天光觀
在陽安縣東二十里有唐碑可讀者云太和初三洞道
士王道賜因張文舉施地基創建按今為明教寺志
云甕亭山在治南四十里石甕舖有覺林寺在大道傍
王欽若題覺林寺詩暫拂塵襟思倍清竹風山色亂泉
聲安民功淺君恩重又策羸蹄向古城趙抃詩古寺無

碑刻僧云不記年自余安所問惟是愛林泉志云分
棟山在州西七十里寰宇記曰山北連秦隴南入資瀘
東北入靜戎軍在靈池縣東上十五里劉涇分棟山少
休亭記云自成都趨陵簡如在蜀必由靈泉過分棟其
山周數百里高大阻險以石次第為步暑雨冬雪則馬
不進僕亦以病告欲少休於是建亭名少休焉志云
西北七十里長松山為州斧展界內諸山皆發脉於此
長松寺本蠶叢廟址開元中馬祖行空和尚乃建寺明

皇召對賜額長松衍慶寺又賜名香為亭以貯之曰御
香亭宋賜名嘉福寺今名靈峰 唐鄭谷集云谷自亂
離之後在西蜀半紀餘多寓止精舍與圓昉上人為淨
侶昉公住長松山舊齋嘗約他日訪會勞生多故游宦對
年曩契未諧忽聞謝世愴吟四韻以弔之詩曰每思聞
靜話雨夜對禪牀未得重相見秋燈照影堂孤雲終負
約薄宦轉堪傷夢繞長松塔遙焚一炷香 志云蟠龍
山與長松相接大厯四年郡大夫傅耆造大佛建院曰

石門以山石分開似之院門又有石形如夔刻字其上
曰夔石楊甲遊長松寺宿石門僧舍以石門霜露白為
韻得露字詩云疾風吹輕衣駕我雲脊路人問一回首
驚絕不敢顧鳥投虛無底渺渺不知處蜂窠蟻丘垤與
世同所驚試看一蒼莽誰有不平處尚憐野僧屋佛面
荒苔蠹斷崖劃呀叻洶洶崩石怒我來得奇觀拄杖叩
巖樹青山有驕色斯客不能句平生二三子慰我一相
遇娟娟松間月幽夕亦可度夜闌更小語風逼遺響去

酌君無多酒繼以木蘭露諸公綽石門院詩云搖空柳
色金猶嫩傍道梨花雪未開只尺長松烟霧裏石門頂
上暫徘徊 碑目云周文王廟碑在陽安縣西北七十
五里即後周高祖文帝之廟舊碑題額云大周植元年
歲次丁丑造元年即後周閔帝之初元也今石刻存

志云去郡治五十里山曰賴簡自賴簡西亘潛渡雁江
而直走龍泉又曰隆泉在治北八十里以澗水隆盛為名
寰宇記云靈泉在靈池縣南三十五里隋初縣傍出湧

泉因置平泉縣於此唐改靈泉志云廢靈泉縣在州西北七十里隆泉驛之右楊甲靈泉山中詩云小縣相籠合濛濛數百家菓蔬爭晚市樵牧亂晴沙落日平林迥青山去路賒偶居無事在隨意問桑麻又野色山圍盡風烟更可憐客情牛鐸外農事藕花前聚汲松根井寬愁石底泉雲安須斗水詩興亦超然又勝地仙靈宅微官也謫居焚香他日夢隱几向來書小睡便山雨長齊稱野蔬逢人問無恙滿意說樵漁又日下叢林薄芊

半肅晚暉閉門成小隱飲水亦生肥醉著溪藤杖歸來
木葉衣狂歌有虎兕吾道只應非又何處長松寺雨花
雲外臺山從百曲轉路入九關回老檜成龍盡殘柯借
鶴來人間斤斧亂風壑夜聲哀又靈泉山上晚望詩云
野曠樹還亂林深烟更微天隨殘日盡雲掣斷山飛玉
壘風烟闊秦樓草木非憑高千萬事今夜客沾衣蒲瀛
宿靈泉無我軒懷次山詩幽軒著無我居此合何人聞
道東山隱當時此地親心源將止水世事甚浮塵今日

尋微跡空餘淡墨春自註云壁間有次山題字也 成
都文類益部十縣多引江水溉田咸為沃壤惟靈池疏
決不到須候天雨俗謂之雷鳴田縣東山下有朱真人
洞洞北岡嶺連屬逾廿里得楮聖母祠化跡尤異民咸
事之祈禱獲應潘洞詩云錦里城東邑高原十六鄉江
流分不到天雨降為常節及三春後晴逾兩月強龍
乖尋穴蟄魚困入泥藏樹影全虧綠苗姿半吐黃耕
夫皆慘戚市戶亦倉忙潛慮寃無雪深疑政有傷推

恩慙睿主引咎謝虛皇
磬折真人宇星奔聖女堂
先時蠲玉饌隔夜浴蘭湯
洞口焚香遠山椒作梵長
幽誠期必達元應果旋彰
雷振南峯下雲飛北嶺傍
聲稊喧竹塢勢迫瀉銀潢
飄灑連三晝霧霓遍一方
稻畦烟漠漠蓮沼水泱泱
物態涵優渥民情遂樂康
洪施周庶品餘潤浹他疆
稔歲還堪待陰功詎可忘
明靈何以報奮藻紀遺芳
按朱真人祠即安靜觀也
楊甲宿安靜觀詩青山轉
龍脊矯首西南天上有仙
人祠臺殿飛後

前下見雲雨興樹色暗平川仙人兩黃鵠一去無歸年
向來道上屨人着幾何錢一朝聞羽化悵望空流涎却
揮囊中金瓦礫來投捐巖巖化金碧香火通雲烟人間
萬事爾旦暮有愚賢而況爭奪場轉手分媼妍仙人一
回首破隴與荒阡紛紛不足道哀此區中緣石泉瀉幽
潔意寂不肯喧夜聞松風露起坐心寥然又云一濯巖
下溪再拜巖中庭清風肅然來吹我衣上腥仙人芙蓉
冠乘月下雲輶山空雜佩響靜夜朝百靈似聞客欲去

小語猶丁寧蕭蕭上松栢急以兩耳聽寂寥古壇外但
掛斗與星天明恐是夢恍惚遺心形去飲石上泉再讀
幽人銘青山無行迹霧雨松冥冥古今集記云靈泉
縣界有瑞應院唐永平中段文昌來攝靈泉尉手植四
松於此院有石刻云乾坤毀則無以見寺寺不可毀四
松其遠乎松至天福初止存其一縣令張松復補植三
株有栽松記刻於石今不存楊甲詩云木落石出荒山
臺上有佛寺孤崔嵬斷椽圻瓦無四壁古佛已倒何人

推野蜂占窠挾肩背山鼠出穴銜髯鬚老僧見我欲愁
哭野葛蔽路官能來文昌種松有斷刻石柱半裂荒莓
苔老翁鼻祖無一在獨樹晚出非耆鮐乾坤未變已先
滅幾見賊火翻狂雷至今野叟鑿山破石窟尚有龍飭
骸當時手種意已遠欲與草木為渠魁

仁壽縣

寰宇記云陵州漢武陽之東境晉初西城戍也州南有
陵井周武帝因以為州名陵井監圖經漢張道陵經

茲地有山神稱十二玉女指陵上開鹽井監以陵名志地也文同奏疏謂因張陵以名井復因陵井以名州矣大觀四年改為仙井避其諱云郡國志曰仙井陰氣襲人入者輒死投以火則烟氣上冲濺泥漂石沸吼如雷今玉女祠是其處王象之碑目云張天師靈廟碑元和十五年知陵州李正卿撰文咸通十五年邱冲書又云黃帝陰符碑在州城至道觀宋京記云此中江山瑰奇自古王公貴人詞客才士未嘗一至故不得見於歌

詠而為浮屠老氏之學者往往擅而有之 方輿勝覽
云艷陽洞在州城北至道觀之後昔天師既誓玉女於
井因藏去其衣鎖之石室或謂之藏衣洞洞在重巖下
崕岬幽窈晦明變化千態萬狀雖距闌闔不數武而若
與世隔蓋道陵修煉之區也杜光庭錄異記云焰陽洞
古老相傳在陵州陽山之下從來隱蔽人莫知其處乾
德三年辛巳正月十六日癸卯井監史保義軍使太保
馬全章夢一紫衣束帶貌冠者狀若道流揖之俱行至

崖壁所告曰此熈陽洞也閉塞多年能開發護持可以
福利邦國又指其地近開小徑曰可斷之勿使常人踐
踏言訖而去及旦往尋其所果見土勢微陷以杖導之
深不可測即令本軍節級侯廣之勾當人夫斲地漸獲
蹤由相次開掘見三重石門洞內並是細砂一無蟲蟻
他物其洞自東入西深三丈九尺闊五尺三寸洞門三
重第一重高六尺闊五尺二寸第二重高五尺五寸闊
三尺七寸第三重從頂至底一向高六尺一寸三門相

去各只三四尺鑄鑿精巧殆非人工三門內南畔別有石房闊七尺四寸高四尺八寸深四尺二寸其後別有一小洞洞門有片石遮掩旁通一縫以燭照之深不知其底北畔亦有石房深四尺闊七尺三寸高五尺房內有石牀一西畔又有小石房深二尺闊三尺五寸高三尺一寸西北畔有石牀長三尺八寸闊二尺八寸有石竈模長二尺三寸額闊七寸竈深八寸周圍三尺五寸計從洞門向東一直至鹽井西相去可四十一丈八尺

井在洞門正東也全章乃召當井監天師院主內大德費省真問之答云天師院見有元和年刺史李正卿著天師聖德碑云天師以東漢建安二年自沛遊蜀占犍為分野見陽山氣象指謂弟子此山直下有鹹泉焉今驗此洞正當井上即夢中所指者也碑目云洞顏隸書艷陽仙洞四字字體兼篆不知何代書旁有款識歲久磨滅東南賈人見此碑本寶而藏之以為真漢隸志謂有東漢仙都四字在天師洞未詳碑目又云仙井監

有蔡君謨法帖蘇東坡心經帖文與可書千字文陸務
觀跋蔡帖云近歲蘇黃米芾書盛行前輩如李西臺宋
宣獻蔡君謨蘇才翁兄弟書皆廢此兩軸君謨真行草
隸皆備石在仙井可寶也淳熙元年九月八日蜀州手
裝勝覽云艷陽洞前有蓬萊閣秦少游詩雄簷傑檻
跨崢嶸席上風雲指顧生千里勝形歸俎豆七州和氣
入簫笙人遊晚岸朱樓遠鳥度晴空碧嶂橫今夜請看
東越分藩星應帶少微明程公闢次韻云半天鐘鼓宴

崢嶸早晚晴陰景旋生湖暖水香春載酒月寒雲迴夜
聞笙金鰲破海頭爭並玉雁排烟陣自橫我是蓬萊東
道主倚欄先占日初明按蓬萊閣在治東百許步又有
含暉閣近五十步趙閱道詩曉川嘉樹照雙扉披豁幽
軒景盡歸自喜吾懷已虛白三嵎山色更清輝輿地
紀勝云平雲閣在郡圃文與可詩陵陽郡事全稀少懶
守長羸半日閒晚後須來上高閣就中無厭是雲山與
可在州送通判喻郎中詩可笑山州為刺史寂寥都不

似州城若無書籍兼圖畫便不教人白髮生又云近日
簿書全簡少吏人惟聽兩衙休歸來便只尋冠履遶遍
林亭山上頭與可又有自然水石記云陵陽守居負
山患石西左砌層崖餘地丈許平夷可屋因植四楹面
午橫楣闢幽軒正對大林高株缺間視遠峰若畫工引
淡墨作巒嶺嶷嶷時與烟雲相蔽虧愛此有佳趣復靜
密公事少休即至宴坐伏息日計數取多乃去外俗不
得知旁頽巨礪如瘤宜鑱刻遂磨治將紀建置歲月

沃水盪拭見黝理若髮狀傾灘平波瀾漫飢迤複疊先
後倫次窪淵聳浪左右役目自非天寫神摹人巧孰能
為是必由融結固已有堅包厚藏待予始發章物蓋顯
晦信在時人理疑亦然苟達此與知命何遠雖爾既有
形必復壞倘後人加護則傳久未易泐也 李膺益州
記云東西南三山相對州治居其中去陵并各一里謂
之三嵎山按古謠云三嵎青陵陽榮三嵎翠陵陽貴郡
守何者仲嘗於東山之下作青榮臺以表之張紹祖山

扉記曰有岡坳來莫窮所自不亟不徐勢趨東南欲薄
城下岐而為三行且五里虎踞盤礴不復去此陵陽之
所謂三山也 西嶠曰跨鼇即州衙坐山李石超覺寺
記云州以跨鼇名者居三嶠山之槩也去治半里方輿
勝覽云跨鼇山上有跨鼇亭每歲上元重九太守率僚
屬燕其上有石姥在山頂歲旱里人轉徙之天即黥黷
雨四注文同賦云上簷岑之飛泉兮披蒼蔚之榛莽爰
有石之跂跂兮旁無他而相伍其遠眺之若人兮迫猶

疑其蹲虎里俗神而甚恭分號相尊而曰姥又云卬山
在其坳即捫膝先生喻汝礪故居 南嶠曰翳嘶頂上
有翳嘶廟相傳神即巴郡太守嚴顏也宋何卓作碑記
併書山前有霄漢堂紹定中隆州軍事推官文太虛為
碑記俱存山之麓有更生寺宋丞相虞允文為其父秦
國公建碑云紹興十八年六月二十六日鄉人鮮于述
既死復甦言地府有更生佛故秦國虞公祺也明日以
告丞相正秦國小祥之期丞相因言秦國屬續時微疾

耳忽睨坐客古佛俱來吾當歸允文泣下公顧曰身得
為佛有何不可含笑而逝按寺在縣東南數百步秦國
又有功德院在城西玉屏山元虞集仁壽寺僧報更
生佛祠前生瑞竹詩云聞道故園生瑞竹令人歸興滿
江干扁舟不畏瞿塘險匹馬誰云蜀道難杜甫溪頭花
匝匝孔明廟裏栢闌珊新堂題作歸歟字定得臨江把
釣竿伯生丞相裔孫也有還鄉詩云還鄉思速去鄉遲
王事相縻敢後期里父留看題壁字山僧打送捨田碑

胡桃筇竹南方要盧橘枇杷上國知此日君親俱在望
徘徊三顧欲何之又云未忍他鄉作故鄉故因使騎入
陵陽鄉人共訝聲音似客路疑將鬢髮蒼親老長懷鄉
里思孫多宜置墓田旁治生自可依諸葛數頃膏腴八
百桑東嶠曰飛泉上有超覺寺按圖經隋仁壽元年
獠反百姓城於山頂避難遂有飛泉湧出獠平泉涸因
呼為飛泉山文與可詩東城兀高峰爽氣浮翠微霞光
射巖壁中有寒泉飛碑目云飛泉院碑唐神龍元年

立超覺寺碑廣明二年陵州刺史蕭銑記志云超覺寺
有爾朱仙影刻二片一全影一半影也有乾道中虞丞
相書碑勝覽云飛泉山下蟠溪丞相何公稟所居何公
始生六日瑞雲山當夜半紅霧亘天此山東去蓋四十
里碑目云佛龕山有唐貞觀中率更令歐陽詢書金
剛經磨崖碑按即佛崖山也在縣東二十五里志云山
有三石像背虛面巖俗呼倒坐寺碑目又云東北石
城山平等寺有天寶四載薛兼金撰道超和尚精德

碑勝覽謂石壁如城絕頂望見我眉也 寰宇記云

州南一里鼎鼻山隆然特起又曰隆山隋大業改陵州
為隆山郡本此郡國志云周之九鼎淪一於此往往見
鼎耳因名南七里一泉水碧色投銀其中成色即變孕
婦飲之墜胎俗以為聖泉矣 圖經云南二十里有麗
甘山山下鹽井是十二玉女故迹以玉女美麗井水味
甘合而為名也又云古鹽井號聶甘井井傍有神祠號
曰聶社 又二十里有儒社山虞允文書碑云紹興癸

酉十月八日允文來遊知先世種德本末感愴久之石
刻今存佛子寺 郡國志云縣西朝女山昔有女子居
山悟道肘脰之蹟印石上猶存 碑目云後唐同光三
年靈泉院碑在本院山上按即譚子池也亦名天池宋
進士郭周藩詩云靈泉在山頭酌之不盈卮試詢陵陽
叟何云譚子池一叟為我言郡有譚叔皮在唐開元末
生兒名阿宜墜地解言笑九歲森髯鬚不食且不飲超
然忘渴饑十五銳行走夏若神駒馳二十八山林人莫

知所之父母念不泯鄉人為立祠大厯元年春此兒忽
來歸頭簪鳳凰冠身着霓裳衣再拜向父母一吐心中
詞兒乃仙子流塵市不可羈鄉人意雖厚立祠將焉為
妖魅一朝據作祟無休期急為告鄉人毀之勿遲遲祠
下多金藏不知始何時盡取濟不給幸勿藏於私言訖
即辭去仙袂風披披於焉撒祠宇突兀成平夷果獲千
黃金貧匱得所資金盡泉繼湧湛若青琉璃不滿亦不
涸旱澇恒若斯禱之立有應翕如塤協箎由來羽化人

出處同鬱儀去今數百載跡在名還垂志云天池山麓
有顯忠院宋尚書僕射何桌藏主處桌從徽欽北狩死
沙漠華表柱猶存又有寶籙院宋寶謨待制陳咸葬所
號寶謨阡已上在址二十里宋故事名位顯者得於墳
側建剎度僧以薦先福焉志云陵州梵宇多以龍名
若龍興龍居龍泉龍厓是也龍厓者鐫石為龍卧厓下
即文與可鐫怪石墨竹處跨鼇山人李新題云淺梢疏
節以瀟湘正向祁寒敵曉霜清興未窮僧已老自餘山

色與溪長雅安僉判程壬孫詩風雨勞先別敢辭尊酒
深一稍牆上竹留作歲寒心俱在寺壁龍興即報恩寺
寺有大悲堂大悲閣王象之碑目云龍興寺大藏經碑開成
五年吳商撰古大悲堂碑乾符三年周宋莒撰俱在報恩
寺篆字心經碑咸通七年仇溥撰并書修大悲堂碑景
福二年僧承微記俱在大小悲閣又云僧曉微碑在寶
林院西蜀明德元年立又有顯教大師碑廣政四年立
鎮驛將軍碑在歸安鎮孟蜀廣政二年立 寰宇記云

貴平縣漢廣都之東南境後魏時與平井縣同置舊治
和仁城開元十四年移治祿川一統志云元憲宗時併
當縣按圖經祿川距貴平縣三十步發源簡州下注資
江而東水多魚蝦縣人利之過祿川有蘭溪唐隱士張
鴻居其上按益州記平井縣兩竈二十八鎮日收鹽四
石如霜雪是也 碑目云貴平縣文宣王廟碑長慶五
年陵州刺史李正卿撰尹泰階書按碑在縣址後百步可
搨而聖賢石像委榛莽中近方瘞之碑後巖下 衆

宇記云唱車廟在貴平縣南九里漢朱辰為巴郡守有
恩於巴吏人送辰到蜀回至此為辰立廟以其山近鹽
井聞推車唱歌之聲為名今鹽井推轆轤皆唱為號今
焉碑目唱車山開國王碑貞元元年貴平令王覺撰年
尚書墓記同光五年領州事陳貴民撰又云貴平西
北四十里寶峰院有唐人撰寶峰院記院內有王羲之
記王氏廬墓銘按志邑王氏女至孝親沒廬於墓側三
年有司立碑表之王羲之為作廬墓銘剝蝕殆盡 寰

宇記梁天監置席郡隋廢為縣里語謠為籍縣志云
在縣百七里今為鎮又籍田公館近華陽界縣南有地
畝餘踏之軟動有泉淵澗旱不涸湧不溢名曰息壤魚
蛇水在其北導江水在其南丹砂山在其西也 碑目
漢黃龍甘露之碑在籍縣江口上銳下方其狀如鐘大
書漢黃龍甘露之碑七字餘不可讀其可識者羣臣將
軍位號蓋為龍紀也

井研縣

寰宇記云縣本漢武陽地有彭山彭首獠姓在始建鎮之東志云後魏置蒲亭縣今縣東一里黃丞相池是也池中生蒲起亭以存古意周地圖云蒲亭縣有鐵山諸葛亮取為刀劍宇文度封鐵山侯即此志謂鐵山一名茆香山在縣東六十里舊始建縣東寰宇記云井鑊山在縣北其山俯臨井鑊因以為名元宗幸蜀井鑊山神見即此山也碑目云唐節度使楊公墓碑在隆州井研縣道傍有石刻云唐銀青光祿大夫檢校御史

中丞上柱國節度使楊公墓旁多楊姓乃其子孫也又有宋何臬撰陳德用墓碑銘在縣南四十里木龍鄉宣和六年立又有青陽仲廣塔記在縣之天王寺其略云寺有塔以藏舍利為層十三此釋迦氏殊勝莊嚴僧祖逢創始於隆興壬午基就力不繼邑人憫焉願續其事邑之利源以鹽自層一至九費所取者三之一施心殊未厭又合力為第十層工徒甃瓦之供自十而上合尖有期矣嗚呼事有一人營之百人終之者不營於始無

以開其先不續於終無以卒其功百人者一人之繼是
塔之興雖多厯年所然終於有成者百人之助也掌化
任剛乞文刻石置層上以紀歲月云

資陽縣

華陽國志資中縣受牛鞞水寰宇記縣本漢資中縣後
周武成於資中故城置資陽縣以資水為名志云城
西二里資谿縈紆九曲合流雁江近掘得宋張方題資
谿橋詩有資水右旋江會合之句也王巖資陽江詩淡

雲殘雪簇江干策蹇遲徊客興闌持鉢老僧來咒水
倚船商女得搬灘沙翹白鷺非真靜竹映繁梅奈苦寒
阮籍莫嗟岐路異舊山溪畔有漁竿范祖禹月夜船行
入資川詩憶昨卧碧山蒼蒼叢桂間白雲為屏石為枕
綠蘿長掛明月閒忽乘輕舟泛江水山月隨人還在此
白鷺驚飛宿靄間青山倒卧蒼波底此時孤棹發中流
川後停波聽棹謳不學子猷中夜逐欲乘明月向資州
志云漢王褒故宅即今縣理解中八卦井三字子淵

筆也輿地碑目云西漢王褒宅在資陽縣西駟馬里今改
為靈仙觀有觀碑二說微有不同舊圖經云資陽南五里
書臺上豐碑廿餘片刻聖主得賢臣頌山是王子淵讀書
處有洗硯池一勺又云縣之延壽寺漢董鈞故宅也
志以為宋張方宅按亨泉墓在縣北廿里有石獸存其
宅未詳方輿勝覽資山在縣西南三里迴然秀拔即
寰宇記之獨秀山也范祖禹資山詩云醺壇巖谷多神
仙鸞車鳳輦隨飛烟神女瀟瀟來暮雨浮邱往往

下雲駟碑目云資陽有三仙磨厓石在三江鎮刻云
貞元十四年十月十日杜錫崔熊席夔三人同遊郡
國志資陽有鰲溪百丈池所謂溪流如鰲池深百尺也
志云學宮前有星月池有井傍池如星東一里有放生
池有碑碣顏真卿書南二十里有孔子溪石壁上鐫孔
子字云其地昔有鄉校祀夫子刻記猶存

資縣

禮記長弘氏孔子嘗問樂焉死之三年而血化為碧按

圖經荑弘資中人有祠在青泥坊數里之內土色尚青
又云王子淵墓在縣東二十里墓前石碣高丈餘碑目
云王褒墓右有河相弘農碑未詳人代 唐元和中羊
士諤為資州守風流文采照耀一時其詩云洛陽歸客
滯巴東處處山櫻雪滿叢峴首當時為風景豈將官舍
作池籠登郡前山作也一雨東風晚山鵲獨報春淹留
巫峽夢惆悵洛陽人柳意籠丹檻梅魂覆錦茵華行
可惜瑤瑟莫生塵郡中早春作也腰章非達士閉閣是

潛夫匣劍寧求試籠禽但自拘江清牛渚鎮酒熟步兵
厨唯此前賢意風流似不孤郡中詠懷作也二毛非騎
省朝鏡忽秋風絲縷寒衣上霜華舊簡中承明那足厭
車服愧無功日日山城守淹留豈挂叢郡中見白髮作
也又邵齊讀經作云壯齡非濟物柔翰誤為儒及此齋心
暇條然與道俱散材誠獨善正覺豈無徒半偈蓮生水
幽香桂滿爐息陰慙蔽芾講義得醍醐跡似桃源客身
嬰竹使符華夷參吏事巴漢混州圖偃草懷君子移風

念畜夫翳桑俄有績宿麥復盈租圓寂期起詣凋殘幸
已蘇解空囊不智減景谷何愚幾日遵歸轍東菑殆欲
蕪竇叔向雨後月下寄懷羊二十七資州云夕霽涼颿
至條然心賞諧清光松上月虛白郡中齊置酒平生在
開襟願見乖殷勤寄雙鯉夢想入君懷 碑目云羊士
諤在郡有毗沙門天王贊碑歲久陷於城北隅紹興中
邵博為守始掘得之又云青松亭記在麗治唐乾符四
年西山節度使成都尹高駢文併書又云瀛洲亭在郡

圃繪唐十八學士鮮于侁文併書又云聚書樓記李石
文博雅堂記張震文俱乾道七年立碑 聚書樓記略
曰國家渡江以來脫五厄之會收四部之富頒詔首降
三館所儲兩學所集分錫郡國州有書樓侈其賜也自
宣和辛丑前太守魏侯潤博以州號多士請於朝減他
州之賜以益此州宛乎如韓宣子所見周書之在魯矣歲
久鼠穿魚蠹且為有力者夜半負去今守宇文侯為州
起發手書之家傳入市殘缺散逸者咸綴錄焉比舊目

增千餘卷因舊樓徙故葺新復為厨肆貯之博雅堂
記略曰宇文紹奕為資守風清事簡則歎曰自吾承先
大父右丞相公餘烈以詩書發身凡二十年聚書上自
孔氏下至歷代諸史稗官小說與夫國典名公之文合
萬餘卷手所校錄者幾半之不為不多矣顧猶有遺恨
者嘗見前漢文字之奧篆隸之工鏤金石而傳後世尚
有可攷乃其在中原者淪於草澤後生不可復見吾家
故所貯吾幸得之不欲擅而有也蓋傳之是邦以與學

士大夫共之於是摹刻漢石經及他碑凡五十四卷覆以石柱大厦名其堂曰博雅登斯者如入太廟見尊壘彝鼎簠簋孟豆之陳聞咸韶濩武雲和笙篪之音列天球河圖寶玉大弓之麗饗太羹玄酒昌歆醑醑之味莫不咨嗟歎息以為君侯好古博雅之士矣方輿勝覽云企仙閣居郡治北憑高視下得一郡之要李石為記以李傅侯張各據一山合四山而拱揖之故曰企仙亦曰蓬萊志云州北二里醮壇山李阿修煉處肖像猶

存杜光庭有醮壇山北帝院記以為張道陵居焉山畔
有洞鑿石七十二級遠望之如入雲中范祖禹詩醮壇
高倚碧天開中有清都白玉臺霧湧雲旌乘月去風吹
仙樂下天來方輿云縣西三里平岡山傳仙宗所宅
也崔中吉崔達亦居此志云玉清山上可以瞰平湖
在州南二里侯真人遺迹存焉又云得道山在州西十
五里張開光於此得道也碑目陳圖南得道山詩鐫於
石壁邵傳跋宋京云東蜀領郡十六而江山瑰奇資

中為最資中勝遊十四而北巖為最謂縣有東西南北四
巖也圖經距州城東三里曰東巖形若剖菴側立千尺
溪壑深杳石壁上刻中興頌顏魯公書縱廣盈丈去磨
厓五里有唐明渡以明皇所經矣巖上鐫宋承議郎鄭
綱詩云逕轉得幽谷雲巖屹相向谿舂偃重簷灣環依
疊嶂緬想融結初鐫鑱自天匠了無斧鑿跡但覺盤根
壯深可數千尺廣逾八九丈洞穴既窈窕松門亦昭曠
廊舍三千界中列五百像巨楠布幢蓋翠蔓垂帷帳木

靈不知名境幽或難狀我時馳征輶奔走勸塵鞅獲此
一段竒欣然愜微尚欲去興未闌行行重回望末云宣
和壬寅題又鐫云丞相大觀文沂國趙公以東川鎮鉞
畫繡來歸弭節鄉郡為父老大夫士七日留乃歸內江
之府第郡守楊頤執門生禮設餞於東巖一時賓客直
秘閣新利路運副韓炳新巴州趙伯總新恭州趙善詔
新大寧監黃中前昌州黃圖南新富順監黃裳制幙勾
龍復成與俱語出林杪慷慨與坐客盡醉公抗大節於

天下而略位貌於鄉黨於是氣凌八極矣。賴請磨翠壁紀盛事共託公為不朽。咸曰然。淳熙壬寅二月十七日題。方輿勝覽城西六里為西巖山行不踰百步石壁夾道如城如峽。又云城南五里為南巖按即重龍山也。巖崖盤屈隱若龍轉有亭閣梵剎跨其上江山城市歷歷可觀。又云江山去郡城半里等慈寺之東唐盧并詩地靈無俗草巖靜有仙禽者此也。郡志崖巔古像半蝕苔蘚乳泉滴漚四時不絕。蜀志補遺唐李渭為

刺史有遊山詩云淮陽清淨理永嘉山水心刻於等慈
寺壁碑目云邵泰修北巖寺碑洗公石馬塔院碑滴水
巖結界碑俱在本寺又云盧井及張公瑾北巖詩俱刻
在龍水縣 寰宇記云龍水縣本資中地隋置在龍龜
溪資陽西界依龜山隴為城今縣三十里龍水鄉是也
溪水屈曲蟠擁猶龍亦曰龍潭石壁有古刻云積雨新
霽灝爽澄空寓異探幽人生行樂殊不易得縣令任聖
用挈鄉人蒲君勉楊述美泊邑士張和叔飲於龍吟亭

風味相投山樹巖石咸助意氣且移罇潭上醉歡歌笑
見月廼歸乾道辛卯仲秋丁未述美書 范祖禹知龍
水縣公餘紀興詩云縣門倚巖谷終日對青峰初仕借
為宰讀書過三冬忘機狎鷗鳥觀稼親老農訟庭可羅
雀銅印苔蘚封 續古今記龍水縣有昭烈皇帝碑形
如方柱頂如蓬壺文剝落三之一紹興丙寅孫原濟書
碑目云龍川邑小而江水環秀距邑不三里曰靈巖
又其傑出者端平乙未夏五月十有八日東川撫屬古渝

李粹甫來酬供於此邑令眉山孫子山警曹烏山馮亨
叔相與訪古靈湫載酒酌其上午暑正劇樹林陰翳巖
氣襲人恍若此身在冰壺絕不知人間炎熱之苦竟日
徜徉興殊未盡而景已晡矣遂拂翠崖而書以紀歲月
云前蜀馮銖靈巖秋月詩青松崖上紫雲生崖下仙人
約舊盟駐馬看碑驚化鶴暮雲回首萬家城銖任前蜀
武城為盤石令也 寰宇記云盤石在州城北二里狀
若盤陀後周以之名縣遂寧傳者盤石遷治記云珠江

流其前丹神隱其北醮壇據其左靈巖蟠其右劉光祖
記云資號珠江以地之靈而產瓊異相傳江中有夜光
如燭方輿勝覽云丹神山在盤石西北五里山之神靈
值享告之即雨寰宇記之丹山縣因此名也 按魏書
保定二年資州盤石人反殺郡守據險自守州軍不能
制總管陸騰率軍討擊破斬之而蠻子復反所在蠡起
山路險阻難得掩襲遂量山川形勢隨便開道蠻獠畏
威承風請服所開之路多得古銘並是諸葛亮桓溫舊道

是年鐵山獠抄斷內江路使驛不通騰又進軍討之一
日下其三城招納降附者三萬戶今資陽之丹山鎮入
其縣界 圖經廢銀山縣在州東四十里山形如鉞今
銀山鎮是其處古今集記云唐田游巖入蜀居於銀山
聚弟子歌雅詩以為樂今山有雅歌臺石刻存志云銀
山侯館因掘地得一小碣石乃黃山谷與門生戴經弟
綱尺牘云七二郎氣秀而有骨他日學問仕宦皆當過
人要須得一佳士與遊養其忠厚之源此最為先務涪

翁書贈戴六六二秀才伯仲志云鎮之杜家溝池水
一泓清冷澄澈下即龍泉洞也天將雨則雲生竅穴霧
彌空谷前有石柱殿相傳龍出毀殿止存二柱崖上鐫
二龍土人懼其飛去摧去兩角山谷曾遊此碑目云龍泉
洞壁刻有淳熙丁未三月九日何少虛少明從成都張
無咎來汲深晤坐因訪舊題數丁亥仲春六日字書與
當時人物磨去已六七年間幾風雨矣少虛且老日有倦
遊之歎方為涪翁釣磯之行益起丘壑之念故山猿鶴其

能忘情哉又有王齊賢李若水王簡熊九能濯凡塵步
武而去 寫韻樓記資州古碑有祝融氏祝誦氏之號
學齋帖碑云資州掘地得漢碑有伏羲倉頡初造工業
畫卦結繩以理海內等語碑目云隋勅改羅漢院碑在
法雲院唐開元棲神山略記在法鉢池前刺史房渙文
崇壽觀碑天寶二年建元宗書額御史中丞宋渾文已
磨滅裴晉公自贊在靈虛院左僕射裴瞻墓在盤石縣
北五里有世譜碑記載於寶靈院馬端臨通考云資州

以新絳帖十卷刻石予家多有之前有目錄元刻麻石
上續搨者不逮舊所得本道勁已上皆不可攷

內江縣

華陽國志江陽郡漢安縣郡東五百里土地雖迫山水
特美好宜蠶桑有鹽井魚池以百數家家有馬一郡豐
沃 水經注云雒水又逕漢安縣謂之綿水口又寰宇
記云周天和中於資中地置漢安戍在水濱尋改為中
江縣隋開皇避先諱改為內江仍徙治於漢安故城即

今縣也勝覽云中江水經盤石縣自十字水流入縣界
又云內江有水深百丈實羣川總會之所矣晉郭璞城
識云山行依舊合水去復還來沈約宋書云中江為內
水涪江為外水按志中江源出汶山自灌口分支經懷
口入簡縣歷資江而下為中江經三堆山下西折而東
至縣復東折而南至裨木鎮又南折而西至黃市市距
三堆十五里一水周環九十餘里而縣當其中故曰中
江江去城不百武與城內桂湖相通以盈縮清濁知之

也按湖在西北街宋黃思莊大書二字于岸石上旁植
桂樹影可婆娑矣 碑目云漢永建五年陳君為漢安
長失其名有陳君德政碑在獠井壩層崖之腹字雖磨
滅然尚可攷又有漢永建五年漢安修棧道記俱在內
江縣 本志云宋紹興於內江縣置安夷軍董昌齡時
為令移徙新市平縣基得小碣一片刻詩云戰馬向風
嘶荒鷄隔水啼終日隨征旆何時罷鼓鼙 志云城東
半里東林寺紹興中建有石佛按即東津寺也范祖禹

資州路東津寺詩云山行無晨暮日暝崖谷昏哀猿落
客淚永路驚旅魂憑陵高山巔俯視大江奔廻環島嶼
合縈轉洲渚屯行雲赴炎天飛鳥下蜀門地遐怪物聚
寺古深殿存憶昔李氏末烟塵暗中原奸雄競草竊割
據窮海根干戈百年後見此敗屋垣我來屬清秋登覽
無俗喧山深虎豹歸水靜蛟鼉騫臨風獨笑叱浩蕩欲
飛翻自註云寺有石佛殿唐乾寧元年建 志云城南
銀杏鋪江邊有放生碑欸為宋都護校尉周仲亨立有

寶光洞壁上錫雲塞浴溪口金波光明久十字紹興進
士邑人閻執中書又云銀杏鋪之陰江所遶也渡江對
岸為葛仙山相傳吳郡葛孝先曾棲其上今有巨人跡
編戶葛仙里之名本此志云治南二十里有高峰山
瀕江有洞曰會真中刻大士羅漢甚古唐大姓閻氏所
闢者洞幽邃時或撫掌聲若鳴蟬中多斷碣志又
云城西二里化龍山麓舊縣址也有長生觀凌風龕及
冷然洞咸淳中郢有朱真人者棲其中修煉有吐納之

術其泠然洞記略曰予落迹安夷有長生池丹臺泠然
洞青眼不逢揭簾而去因有容迹安夷尋達者無緣寄
語共乘風之句也咸淳癸酉九月五日記又留題化龍
山云郭外郊西柳已芽東流注目浩無涯江明白白紅
紅樹春在三三兩兩家幾度來臨逢社燕一樽相對到
昏鴉此邦物色吟成畫高謝山中景致嘉刊碑在長生
觀中正嘉之間山崩得古鏡及劍印石刻識云有宋之
始化龍為記日月相均永遠不墜亦疑朱仙所留 又

五里為聖水寺寺有靈湫古碑紹興庚申水觀禪師所
創邑尉蔡逸詩云二月春事半縣花無數開江頭連騎
行江霧結紅埃下馬坐清蔭觀魚大江隈行行歷山寺
金碧森樓臺拂石有唐碑字老生莓苔緬想古今事悠
然一傷懷解榼醉泉石徬徨不忍迴辭徑下扁舟重開
樽壘江烟暝川谷冰輪出崔嵬水面映金波流光浮玉
杯蕩漾洲渚間往來恣徘徊一棹轉圓沙燈火來相催高
歌賦厭厭會須期再來又云盡日苦征賦公餘來放懷霽

雲生怪石宿雨溜懸崖鳥倦晨猶伏僧眠午未齋高人
莫相笑仙尉亦吾儕又云城西廿餘里三堆山三峰
插漢高閣憑空有古石像土人多遊焉昔耕者於山掘
得小銅版上鐫詩云塵世不我留身寄白雲浮若問真
遊處三山與十洲不知為何代物志云西北十五里
有華萼山有寺臨江厓上鐫漚瀾有斐四字唐范崇凱
書方輿勝覽華萼山距內江縣十里許唐范金卿讀書
處按范崇凱玄宗時獻花萼樓賦為天下第一鄉人榮

之以賦名其山也其弟元凱亦能文時稱為梧岡雙鳳
李太白贈范金卿詩云君子柱清盼不知東走迷離家
未幾月絡緯鳴中閨桃李若不言攀花願成蹊那能吐
芳惠好鳥相招攜我有結綠珍久藏濁水泥時人棄此
物乃與燕珉齊拂拭欲贈之申眉路無梯遼東慚白豕
楚客羞山鷄徒有獻芹心終流泣玉啼祗應自索莫留
舌示山妻又范宰不買名絃歌對前楹為邦默自化日
覺冰壺清百里鷄犬靜千廬機杼鳴浮人少蕩析愛客

多逢迎遊子覩佳政因之聽頌聲白集又有青山橫北
郭白水遶東城此地一為別孤蓬萬里征浮雲遊子意
落日故人情揮手自茲去蕭蕭班馬鳴一首志云亦送
崇凱作也金卿所居故址有卧碑鐫華萼樓賦剝落殆
盡山之後灣有金卿墓志云石笋山治東南七里有
石如笋者三下圓上銳聳峙漢表清影沉江則長虹滿
地新月初上則明燭當天形家謂為邑之地軸以三堆
為天闕云

蜀中廣記卷八

欽定四庫全書

史部

蜀中廣記卷十一

詳校官編修臣翟 棟

編修臣程嘉謨覆勘

總校官庶吉士臣何思鈞

校對官學正臣陳 本

謄錄舉人臣羅元文

欽定四庫全書

蜀中廣記卷九

明 曹學佺 撰

名勝記第九

川西道

成都府九

漢州

古語云大旱不旱蜀有廣漢華陽國志所稱蜀之淵府

浸以縣雒者也陳子昂為雒縣令張知古頌德碑云此
邦膏腴利在江浸陶翰送孟浩然入蜀序云廣漢城西
三十里清江夤緣兩山如劍中有微徑可入岷峨括地
志云郡在水南故曰漢陽寰宇記云湔陽故城在州南
一里湔陽漢縣以其為湔水之所經矣 圖經洛水在
治東半里又名沉犀水水性剛宜淬刀與信州葛溪同
雒字元從水漢火德忌水故改從雒蔚宗後漢書曰洛
城南每遇陰雨常有哭聲聞於府中和帝時陳寵為太

守勅縣宰收葬骸骨哭聲遂絕三國志建安十九年先
主攻雒城拔之襄陽馬良書詣諸葛亮曰承雒城已下
尊兄配業光國鬼兆斯見者也圖經雁江在治北半
里李膺記云張任與劉璋子循守雒城任勒兵出於雁
橋戰敗即此雁橋東有嚴君平卜處土臺高數丈宋郭
印卜臺記云故老相傳州治形勢南高而北下多火災
真君鑿井廛間上憲七星杓指南方以厭勝之越千百
年卜臺既已墮落而井之應輔星者亦多堙塞矣益

州記云廣漢郡北一里半有犀橋即白魚水也志云河
出壩口有白魚出焉在治東十里 錄異記云漢州赤
水有湧泉水脉五六自山下湧出因成大池流三二百
步可激碓磴匯為大溪 志云治西五里石梯河源亦
出壩口河岸甃石如階級有石梯橋下出緇土可代墨
又云彌牟河在治西二十五里自灌口經州會金堂峽
俗謂之三水關矣 常道將云廣漢郡本治繩鄉永和
中陰平漢中羗反元初二年移涪後治雒城王莽改曰

就都公孫述名曰子同益州以蜀郡廣漢犍為為三蜀土地
沃美人士俊乂為一州稱望樂史云漢州有西伍城宋元嘉
年於舊伍城立新都國乃于城南別置西伍城焉漢選廣
漢太守每重德高俊表章禮物殊于諸郡前有趙護第
五伯魚後有陳寵趙瑤皆公望也唐天寶初房琯以故
相為是州有舊竹亭鳴琴其上公去已久而李文饒劉夢得過
其地思之不置形於詠歌德裕詩云流水音長在青霞意不
傳獨悲形解後誰聽廣陵絃禹錫和云尚有竹間露永無

棋下塵一聞流水曲重憶餐霞人鄭澣和云石室寒飈警孫
枝雅罷裁東山水操絃斷弔餘哀次律子治西鑿有西湖自
題云高流纏峻隅城下緬邱墟決渠信浩蕩潭島成江湖結字
依迴渚水中信可居三伏氣不蒸四達暑自徂同人千里駕鄰國
五馬車月出共登舟風生隨所如舉麾指極浦欲極更盤紆繚
繞多宛致夜盡情有餘遭亂意不開即理還暫祛安得
長晤語使我憂更除杜甫陪王漢州留杜綿州泛房公西湖
詩舊相恩追後春池賞不稀闕庭分未到舟楫有光輝

豉化萼絲熟刀鳴鱸縷飛使君雙皂蓋灘淺正相依李
德裕月夕遊房太尉西湖詩云丞相鳴琴地何年閒玉
徽偶因明月夕重敞故樓扉桃李蹊空在芙蓉客暫依
誰憐濟川楫長與夜舟歸又云晚日臨寒渚微風發櫂
謳鳳池波自闊魚水運難留亭古思宏棟川長憶夜舟
想公高世志祇似冶城遊劉禹錫和云太尉留琴地時
移重可尋徽絃一掩抑風月助登臨榮駐清油騎高張
白雪音祇言酬唱美良史記王箴又云靜對烟波夕猶



思棟宇清卧龍空有處馴鳥獨忘情顧步襟期遠參差
物象橫自宜雕樂石爽氣際青城鄭澣和云木落漢川
夜西湖懸玉鉤旌旗還夜次舟楫泛中流目極思前事
神交如舊遊瑤琴久已絕松韻息悲秋又云林端落照
盡湖上遠風清水榭芝蘭室仙舟魚鳥情人琴久寂寞
烟月似平生一泛釣璜處再吟鏘玉聲嚴公貺題漢州
西湖詩鳳池才未盡餘思鑿西湖珍木羅修岸冰光映
坐隅琴臺今寂寞竹島尚縈紆猶蘊濟川志芳名終不

渝薛能題漢州西湖詩西湖天下名可以濯吾纓况是攜家賞
從妨半驛程嘗茶春味渴斷酒晚懷清盡得幽人趣猶
嫌守吏迎重餐逢角暮百中喜詩成坐阻湘江謫誰為
話政聲文同題房公湖詩一頃清波四面平宛然唐相
舊經營高秋林木形容老落日樓臺綵繪明有景可尋
蘭櫂遠無幽不入竹橋橫二年所得官居樂肯厭頻來
緩帶行陸游題房公西湖詩房公一跌叢衆毀八年漢
州為刺史繞城鑿湖一百頃島嶼屈曲三四里蘓轍題

房湖詩酒壓郾筵不用酤花傳五老出新圖此行真勝
成都尹直為房公百里湖魏了翁題漢州房公樓記略
云成都宇文侯鎮廣漢之明年威行惠孚侯度聿修廼
作樓於郡之西湖名曰房公於以申懷賢尚德之意樓
故金龜亭綠波翠潏橫陳夾翼而亭宅于虹橋之左有
樓其上端握要會矣華父又和宇文漢州乞房樓記詩
云房公胸中妙刀尺剪刻玻璃貯寒碧今侯着樓於其
上竹色荷光得良覲詩來殷勤問故侯別日雖賒情轉

密因思當年飛蓋遊鷗鷺不驚潛鯉出春濃雪絮人影
亂秋老雲松半天屹蘇公二十四橋月尚愛西湖風月
夕江山好處餘戀繆縱不即人人自即況今簷櫳雲與
齊激楚高歌朋友集向來寒乞翻自嗤詩掃黃泥已無
迹功名老我後加鞭文字餘人先奪席欲搜萬象供刻
畫自有此湖難此筆終當為君記所遊摹寫蒼顏真六
一按金龜亭者偽蜀武成三年庚午六月五日癸亥廣
漢太守孟彥暉奏西湖有金龜徑寸遊於荷葉之上畫

圖以獻故以之名亭也 丹淵集云聶侯友仲立漢州學制度宏侈為二蜀之冠當時不知何所得巨石置講堂之後質狀怪偉勢若飛動昔孟氏僭竊苑囿所蓄者皆寧武軍節度使顧璘所進昶既面縛是物亦散落民間余在成都往往見於好事家園館凡自璘許來者一皆具款勒此非耳而其完厚瓌詭上下可愛雖到茂灌牛竒章號為好事諒亦未嘗見此者也治平丙午秋余視郡進士試於此旦暮環繞其下歎惜之不足而為之銘

其辭曰廣漢學宮後有奇石礫硿一抱欽崙九尺怒蜃
驤首狂龍轉脊擎空將翻壓地欲坼神乳溜腹老苔漬
額堅包勁脅潤吐活脉誇殺羽人詠窮墨客敢告存護
千古怪碧與可又有題漢州王氏林亭詩云短笻踈籬
入野扃竹烟松露滿襟清奔湍激險飛寒響弱蔓穿深
挂短英惜去更觀曾畫壁記來重注舊題名門前便是
紅塵道誰肯同過洗俗纓亦皆韻事也

什邡縣

寰宇記云什邡本漢雋縣屬廣漢郡舊置在雍齒城今
於城北四十步立縣雍齒即漢什邡侯也墓在縣南一
里李膺記云雍齒墓高四丈闊四畝有石麒麟二志
云今縣治乃唐紫極觀地也廳左衛真人墓在焉觀前
舊有水西南流名老君洗腸溪真人乃衛元嵩雲笈七
籤以為有舊碑刻存矣 寰宇記云南陽郡故城在縣
西二十三里李膺記云漢中李雄亂蜀遣李壽盡掠漢
州五千餘家流寓於此晉太康元年立南陽郡後魏三

年廢南陽郡南七里有新婦水故老傳云昔有新婦勤
於侍奉負汲水遠不辭冰雪泉為之湧出故曰新婦水
流合廉江水 志云治北六十里高境關關外即章烙
山亦曰章山又曰洛通又曰楊村諸山物產出焉華陽
國志謂大姓楊氏之所居矣山有風洞即之氣冷有火
洞即之氣熱古老傳云符堅有子避難死於洛通山即
此 古碑云江水出高境關大郎廟前始大放分流十
支又云自章山內合五溪而總名洛江出章山分洛江

為十河縣之名即從起也 華陽國志李冰導水於洛
通山志云章山後厓有大冢碑云秦李冰葬所按開山
記云什邡公墓化上有升仙臺為李冰飛昇之處古蜀
記謂李冰功配夏后升仙在後城化藏衣冠於章山冢
中矣 方輿勝覽云治西五十里有大蓬山高崖矗天
而立瀑布飛落最為奇觀有保聖院紹興中謝中大蓬
山記略曰嘗自紫微度綿水覺佳氣逼人竹木蕭蕭臺
殿聳岌松根寒泉流注不竭懸崖萬仞瀑布如線山腰

有大小白厓甚奇上有太子宮遺址僅存而事迹不可
攷厓下有洞極深邃中有石柱撐之左右映出白龍十
三蜿蜒如畫又自西越澗行一里有馬師井捫蘿陟磴
至峰頂有石室可坐百人蝙蝠大如鳥所謂扁蝠洞者
也北望龍居其狀如偃月有保聖寺唐天福中鏡鎰禪
師誅茆之處其曰馬師即馬頭陀與師同時者 本志
云大蓬山朝雲初起日射圓光於山頂覩佛臺西澗光
暈數重作青黃紅綠色稍升象王峰大徑百丈中有黑

影彷彿佛像食頃方散山高百里六月積雪不消國朝
明本禪師因名為鑒華山高僧傳馬祖什邠人志云
北郭羅漢寺唐中宗時馬祖出家之處山門右有說法
臺臺角有井皆祖所剏勝覽云龍居山在什邠縣有
等慈院飛瀑千尺虛亭屹然橋橫路轉高栢擁翠志云
龍居寺隋建旁有神龍潭其右為蜀王孟知祥墓也
孟昶攜花藥夫人至寺避暑寺僧水觀禪師先一月
預知之因賜號為預知焉成都叅軍任愿蜀王廟

記云什邡之西行十許里有古佛寺曰南陽宋大明中
所建也後周沙汰寺廢隋文帝以皇子秀為蜀王王以
暇日獵至廢寺有兔逸入壠中發壠得石像甚巨於是
即其舊址復為寺以像寘其中時有進禪師者善水觀
王異之從問道得大無碍今寺之左有王祠祠下有泉
匯為陂浮於方亭達出於雒其發源流百許里溉田數
十萬頃雖大旱民不告病其為利可謂深且博已即泉
之始則進禪師水觀之餘波也李白冷泉亭詩惜彼

落日暮愛此寒泉清西暉逐流水蕩漾遊子情空歌望
雲月曲盡長松聲志云亭在南陽寺矣

德陽縣

地理志云東漢分綿竹置德陽寨宇記云綿竹縣故城
在縣北三十五里李膺益州記云石子頭二十里即故
綿竹縣諸葛瞻埋人脚戰處也樊真公德陽錄略曰
邑西南石亭江畔有石亭寺江畔有石亭因以名江晉
李特李流軍綿江趙廡遣費遠斷北道屯綿竹之石亭

是也德陽學宮有石版陰陽書缺根因石阜以庭宇跨

飲江之鼇龜岌飛簷與鐵柱挿清江之裔淪眩古潭之

百尺涵萬象於瑤崑耿月鬼以終日湛天容之方春信

蒼蒼之非色極深遠而自然疑貝闕與珠宮有玉函之

老人予南征其萬里友魚鰕與蛭螾逝將去而反顧託

江流以缺首末無顯名其字盈版字勢遒勁似王稚子

墓前石闕漢人書法也繹其文意似為石亭而賦或三

版四版今存一版斷文矣縣一名旌陽晉太康初許

遜為旌陽令屬歲大疫死者十七八遜以神方拯治之
符咒所及登時而愈蜀民為之謠曰人無盜竊吏無奸
欺我君活人病無能為本志云東關內有旌陽井許真
君浴丹於此其水香冽暑飲尤宜半倚江岸漲減不崩
治有三造亭李膺記云秦子勅之舊宅也太守夏侯
纂三造門故以為名其宅綿水衝毀僅有餘跡南偏
有善果寺晉泰始中建唐名善寂寺王勅碑記以為梁
武帝所建矣 寰宇記云縣北五里有鹿頭山自綿州

羅江縣來迤邐入縣界古老云昔漢有張鹿頭於此造
關因以為名杜甫鹿頭山詩云鹿頭何亭亭是日慰饑
渴連山西南斷俯見千里豁遊子出京華劍門不可越
及茲險阻盡始喜原野濶殊方昔三分羈氣曾聞發天
下今一家雲端失雙闕悠然想揚馬繼起名碑兀有文
令人傷何處埋爾骨紆餘脂膏地慘澹豪俠客仗鉞非
老臣宣風豈專達冀公柱石姿論道邦國活斯人亦何
幸公鎮踰歲月其下有龜勝山道場乃高崇文破劉

關處初闢據鹿頭關高與之對壘屯營有神龜由壁門來
蹲於牙旗之下公命投之遠礮翌日復至議者以龜介
蟲之長介冑斯服蜀有龜城其城是師果為受降之兆
乃以龜勝名山立道場焉掌書記鄭宗經大唐乙酉明
年六月記 本志云治北十里秦中治天下第七治也
上應箕水豹王逸少嘗欲遊焉石洞產九節菖蒲秦時
韓仲修煉之所此雲笈七籤所載以為其山浮寰宇記
云浮中山在縣北三十里益州記云南陰平鄉東有浮

中山每芳春遊人登賞謂之迎春岡四面斷絕也 錄

略云縣東南有鄧林禪院按邑人公孫輔記云吾鄉精藍之勝鄧林為第一其地蓋起於緜洛之左宛若秦隴坂高下起伏北包靈龕南亘旌邑直走於鑒華之東南楓楠柞柏拔地倚天蔚為鄧林東山襟其前江水帶其中川原綺錯雲烟出沒飛鳥上下農夫耕穫樵牧往來庭戶間皆一覽而有也真公以名從大將軍鄧芝而起者非鄧芝欲居德陽乃遂寧縣

綿竹縣

綿竹縣漢地理志云紫嵒山綿竹所出有綿水流注謂之綿堰口矣寰宇記云綿竹縣舊屬廣漢郡隋開皇三年徙晉熙郡城改為晉熙縣十八年改為孝水縣以境有姜詩泉焉高僧傳南武都今之孝水縣也蓋縣北三十里紫嵒山極高大亦謂之綿竹山亦謂之武都山唐吳融綿竹山詩云綿竹東西隅千峰勢相屬峻嶒壓東巴連延羅古蜀方者露圭角尖者鑽箭鏃引者蛾眉

彎鉤者鳶肩縮尾螺青蛇盤頸低玄兔伏橫來突若奔
直上森如束歲在作噩年銅梁搖蠆毒相國京兆公九
命來作牧我提虎僕毛專奉狼頭纛行府寄精廬開牕
對林麓是時重陽後天氣曠清肅茲山昏曉開一一在
人目霜空正沈寥濃翠霏撲撲披海出珊瑚貼天堆碧
玉俄然陰霾作城郭纔霰霖絕頂已凝雪晃朗開紅旭
初疑崑崙下天矯龍銜燭亦似蓬萊巔金銀臺疊蹙
紫霞或旁映綺段鋪繁縟晚照忽斜籠赤城差斷續

又如煮吳鹽萬萬盆初熟又如濯楚練千千匹未軸又
如水精宮蛟螭結川瀆又如鍾乳洞電雷開巖谷丹青
畫不成造化供難足合有羽衣人飄飄曳烟躅合有五
色禽叫嘯含仙曲根雖限劍門穴必通林屋方諸滄海
隔欲去憂淪覆羣玉縹緲間未可量徃復何如當此境
終朝曠遐矚徃徃草檄餘吟哦思幽獨早晚掃欒槍
笳鼓迎暢轂休飛霹靂車罷繫蝦蟇木勒銘燕然
山萬代垂芳郁然後恣逍遙獨徃羣麋鹿不管安

與危不問榮與辱但樂濠梁魚豈怨鍾山鵲紉蘭以圍
腰採芝將實腹石牀須卧平一任閒雲觸 綿竹山有
鹿堂致即二十四化之第二化也漢元帝時老子偕張
道陵遊此有仙基仙宮古人度世之處李膺記云山崖
有隙出神泉若詣者精志則泉流奔湧其信道不篤便
清源頓竭也又有庚除致為第六化方輿勝覽云山有
二石室三國初有霽雲子者入洞中見樓臺金碧門者
呵止之曰子凡骨可亟去不然及禍霽雲子出後再至遂

逕路矣 武都山有玉妃溪成都耆老傳載妃與五丁
同生父母棄之溪後聞呱呱聲就視乃一女五男女即
蜀妃男即五丁故華陽國志云武都山精化為美女也
山下有嚴真觀乃君平父嚴子晞所創楊天惠記之
甚詳見神仙傳又有君平池古老傳云君平挾宅上昇
基陷而成池 武都山有惠淨寺梁太清年建唐貞觀
九年寺西院立七佛堂一僧舍王勃為之銘曰武都仙
鎮靈虛輿域邑動香城山開淨國澗流百道峰雲五色

谷暗藤斜山高樹逼千楸鶴列萬棋星懸分林構趾接
磴開屢臨階竹樹遶棟風烟龕前怪石塔下秋泉綠崖
疏逕青岑拒室霧道相縈烟房互出葉濃磳淨花深嶂
密鳥度難尋援驚易失簷分石竇地絡金沙丹丘抗月
碧洞棲霞松開野路桂列山家金爐栢葉寶座蓮花砌
因巖曲橋隨峰返果出天厨香來仙苑玉鑄啓曙金鐫
照晚谷思鍾長山悲鐸遠閭閻賤勝銅墨高情聲飛別
邑望動專城懸金道肆刻石山楹千載之後吁嗟今名



又有響應寺在馬跪溪相傳隋蜀王秀妃患心疾召寺僧法進不往王怒親往加罪之所乘馬至溪邊而自跪若為之請者因名馬跪溪高僧傳唐武德初釋世瑜獨住此山有四猿供給山果等食初惟一泉後有三泉流出於下俗謂之三溪河也亦名射水河相傳蜀王秀營軍於此乏水王乃築臺望三溪山下發三矢有三泉從石竇出遂成河流又有馬尾河注之河出無為山宋淳熙間有碑云羣雁排空成無為二字因名有河水出焉

流如馬尾因名馬尾河也 志云錦竹故城有二其一

為宋時築在郭外西南隅近龍頭橋即湖橋也魏華父
湖橋記曰知縣宇文西叔峒度地飛鳧門外瀦為湖周
廣六十有五丈伐石為四砭砭崇四尺架橋其上而屋之
衡從合十丈以通南北車徒之往來蓋紹定四年碑也其
一為漢城即德陽之西界華陽國志稱沘鄉有孝子姜
詩田地宅是矣姜詩廟曰孝感鄭少微記略云漢州德
陽縣西北四十里有鎮東漢姜詩故宅在焉故號姜詩

鎮治平中知綿竹縣事郭震謂士游行甚高宜諱其名
白部刺史易之鎮遂號孝泉然廟猶因俗為呼於是開
州司理叅軍白壽朋與鄉之士民列於縣曰姜詩夫婦
事跡最詳於漢史舍側湧泉至今不絕民賴灌溉或遇
旱厲禱焉輒應其厚俗利人之功居多廟額獨未蒙賜
敢請縣乃上之有旨賜名孝感命至之日稚羣夾塗載
舞踴躍爭觀為人子若夫者咸欲詩之行在其身也為
人女若婦者咸欲龐氏之行在其身也為人父母若舅

姑者咸願有子如詩有女有婦如龐氏也則又相與說於他州之民曰吾鄉雖僻幽而姜詩夫婦乃吾東家子也爾州曾有是耶方且侈上之賜以永稱厥名云爾

綿州

元和郡縣志云按州城理漢涪縣也去成都三百五十里依山作州東據天池西臨涪水形如北斗卧龍伏焉梁天監中張齊賢為太守更造樓櫓却敵有東西門東門久塞富樂山氣所衝門開則喪亂宋元嘉初太

守王懷素開之果致喪敗爾後復塞 輿地碑目云漢
刺史李頓碣在綿州又云州治十賢堂繪涪翁龐統蔣
琬杜微尹默李白陳該蘇易簡王仲華歐陽修共十人
又云綿州通判廳有伐木堂鮮于子駿立文與可記陸
務觀劍南詩藁云姜楚公畫鷹在綿州錄叅廳杜少陵
有詩輿地紀勝云六一堂在司戶廳舊為推官廳昔歐
陽文忠父鄭公觀嘗為推官公實生此地 方輿勝覽
云越王樓在城西北唐顯慶中太宗子越王貞為刺史

建杜甫詩綿州州府何磊落顯慶年中越王作孤城西
北起高樓碧瓦朱甍照城郭樓下長江百丈清山頭落
日半輪明君王舊迹今人賞轉見千秋萬古情刺史喬
琳詩三蜀澄清郡政閒登樓攜酌日躋攀頓覺胸懷無
俗事迴看掌握是人寰灘聲曲折涪州水雲影低銜富
樂山行雁南飛似鄉信忽然西笑向秦闕唐詩紀事王
鐸與綿州守于興宗登越王樓以詩寄朝士云謝眺題
詩處危樓壓郡城雨餘江水碧雲斷雪山明錦繡來仙

境風謠入帝京恨無青玉案何以報高情刺史樊紹述
越王樓詩序云綿之城帝獨獵掀明威瀾石硝馳涪瀨
左陵凌紅穠簪天地送行癸壬且掬跼踖於西北蟠紅
顏青越王貞故為樓重軒疊飛門明牕蒙傘蹇蹇予
始登謂日月昏曉可窺其背雷電合風雲溝霜辛露
酸星辰介行神鬼變化草木顯繡髻銜蓑艾皆可察
極既縈視其江帶又極視其土岡斷暴遠近山嶽嶮若
閩之東皇天原開見荆山我其黃河矚然為曲直淚

雨落不可掩因口其心曰無害若其日杲星星過歸尚
悲不能解重為詩以釋益不可顧謂郡中諸君能無有
意綴以華艷其念蓄云詩曰危樓倚天門如闔星辰宮
檠薄龍虎怪洄洄繞雷風徂秋試登臨大靄屯喬空不
見西北路老懷益凋窮石瀨薄濺濺土山杳穹穹昔人
愴為逝所適酖紅顏今我茲之來猶校成歲功輟田植
科畝遊園歌芳叢地財無聚厚人室安取豐既乏富庶
能千萬慚文翁勝覽云江樓枕城之東隅上有唐時

江亭記杜甫送嚴侍郎到綿州同登杜使君江樓宴詩
野興每難盡江樓延賞心歸朝送使節落景惜登臨稍
稍烟集渚微微風動襟重船依淺瀨輕鳥度層陰檻峻
背幽谷牕虛交茂林燈光散遠近月彩靜高深城擁朝
來客天橫醉後參窮途衰謝意苦調短長吟此會共能
幾諸孫賢至今不勞朱戶閉自待白河沉 文苑英華
王勃綿州北亭羣公宴序云下官人間獨傲海內少徒志不屈
於王侯身不縛於塵俗孤吟五嶽長嘯三山昔往東吳

已有梁鴻之志今來西蜀非無張載之懷況乎踐名場
攜勝友風月無幾琴酒俄乖半面十年一別千里何少
府故人攀桂撫金石而論心韓法曹新餞班荆臨江湖
而執手離亭北望烟霞生故國之悲別館南開風雨積
他鄉之思於時蒼雲寡色白日無光沙塵起而桂浦昏
鳬雁下而蘆洲晚傍鄰蒼野霜飄橘柚之園斜枕碧潭日
斷芙蓉之水既而登臨惜別驟駕少留季札何人親逢贈
縞子荆不慙思掛傾城惆悵北梁揖琴臺而漸聞徘徊

東道思錦署以行遙嗟乎人事乖矣江山遠矣請命離
前之筆為題別後之資五際飛文想羣公之不讓一言
有贈知下筆之有神 盧照鄰綿州官池贈別詩云輜
軒遵上國仙珮下靈闕樽酒方無地聯綬喜暫攀離言
欲贈策高辯正連環野徑浮雲斷荒池春草斑殘花落
古樹度鳥入澄灣欲叙他鄉別幽谷有綿蠻 本志云
巴字水在治西四里涪水自北經城西而析為二安水
自東迤邐繞城東南匯之芙蓉溪成一巴字每江漲登

山望之點畫天然甚肖也芙蓉溪即東津杜甫觀打魚
歌是此處子美又有巴西驛亭觀江漲呈竇使君詩云
宿雨南江漲波濤亂遠峰孤亭凌噴薄萬井逼蒼霄
漢愁高鳥泥沙困老龍天邊同客舍攜我豁心胸唐庚
芙蓉溪詩云人間八月秋霜嚴芙蓉溪上春酣酣人間
二月春光好溪上芙蓉迹如掃小兒造化誰能窮幾回
枯枿還芳叢只應人老不復少有酒且發衰顏紅 李
膺益州記云金山在涪縣東五十步東臨澗水光彩映

川長七八里每夏淹雨金粟散出州東五里有靈山
郡國志云昔有神女於此擣衣山南絕巖有方石明瑩
謂之玉女擣練砧也周地圖記云富樂山高廣為衆
山之秀登之望見州內勝覽云在巴西縣東五里劉先
主入蜀劉璋延於此山望見蜀之全盛飲酒樂故得是
名又有石盆山迎真觀卧佛院洞靈觀俱在此山之麓
雍有容詩當時四海一炎劉至此已堪悲失脚出語翻
為樂國想是人止可徧方著大漢曾封龍準翁聞道山

河錦繡中安能鬱鬱久居此睥睨三秦日欲東唐子
西詩富樂之名誰所留建安年中劉豫州擁兵入蜀萬
貔貅孱璋送國來迎頭軍中釀酒椎千牛肉如巴山酒
如涪酒酣握手登高丘極目紫芋蹲春疇冉木震富樂
山移文云星車熒熒駕風鞭霆出霧入雲回翔太清是
為古富樂之英方劉豫州置酒高會於吾山也升高延
佇虎視徜徉沃野綿亘鬱乎蒼蒼曰富樂哉有德易王
其興勃然唐高宗顯慶中建垓山上奠簡江臯瑞氣凝

於翠嶺祥光燭於丹霄武宗會昌中投金鮫室沉璧龍
淵雲鶴降以飄飄天光舞而蹁躑石刻長存於今屹然
碑目云富樂山有唐乾符間王助碑又有集古堂淳
熙間史祁建忠舉近郭仆碑植於堂之左右而繪像於
堂中渭川王讓記略云西絕涪水有山曰栢下諸葛公
營壘在焉而喬木婆娑者蔣公琰萬秋之宅鍾士季之
所嘗致敬也漢書郭玉傳涪翁者左綿人肥遯不出
姓名所居處為漁父村玉從之受易焉本志州南四里

有巖即涪翁山也宋別駕楊叔蘭書涪翁山三字刻於石併刻弔涪翁詞 益州記云猿門山在涪縣之北二十五里上多猿其峰磔鑒如門故曰猿門 寰宇記云鹽泉縣漢涪縣地後魏於此置魏城縣唐武德二年分魏城置鹽泉縣以地有鹽井民得採漉為四方賈售之地蜀都賦云家有鹽泉之井取此為名羅隱魏城逢故人詩一年兩渡錦江遊前值東風後值秋芳草有情皆礙馬好雲無處不遮樓山將別恨和心斷水帶離聲入

夢流今日因君試回首淡烟喬木隔綿州成都文類
魏城縣南五里有長嶺高涼泉出焉其始至也則風於
一山玉留潺湲衆竅成吟笙竽匪禁登之恍然如謁羣
仙心意自殊若與道俱橫石如隕匪塹匪鑿傍架絕壁
根山不落上摩層霄屹然峩峩其間可俯而入焉則空
峒博敞如堂如室苔駁古壯竒怪生妍旋開混元益偉
造物然則始知乎山林獨得之士一邱自足窮年忘歸亦
何必際耕夫於清冷送白日於昧谷然後為異也傍有

舊銘隱磷餘字即久視元年崔司業融守涪茲邑高祺
致禱刻石斯存矣元和元年侍御史李訥記 州南百
里界於潼川四山如城涪水經乎其中漢設涪城縣於
此三國志昭烈自葭萌襲蜀進據涪城是也杜甫涪城
縣香積寺官閣詩云寺下春江深不流山腰官閣迴添
愁含風翠壁孤雲細背日丹楓萬木稠小院回廊春寂
寂浴鳬飛鷺晚悠悠諸天合在藤蘿外昏黑應須到上
頭 按李雄春秋巴蜀謠曰譙登治涪城文石在巴西

張羅守合水巴氏那得前是涪城與巴西向為犄角之地予以萬厯壬子陽月過此有羅漢寺是舊縣址

羅江縣

寰宇記曰縣本廣漢涪地晉於梓潼水尾萬安故城置萬安縣李雄之亂移就潺亭今縣城是也 註水經曰潺水出潺山歷潺亭而下注涪水今縣北二里有潺亭故址舊經云有唐開元二十四年立潺亭碑文字磨滅尚有潺亭二字碑陰有宋邑令太常博士宋彥嘉書云

嘉祐三年予始署邑事明年訪古迹而潺亭廟有遺址
存焉東南百步有碑仆於民田中其潺亭二字亦不復
覩稽其址歷數百年廟與碑俱廢是神之祀於民者不
亦闕乎且俟因官之美材而復廟貌未幾里民請自修
之次年廟成秋大旱晨禱而夕雨自是潺之民益靈其
神相與輓碣揭之祠下時嘉祐五年也 圖經唐明皇
幸蜀至萬安驛歎曰一安尚不可況萬安乎乃迴輦宿
於真明寺按驛在治西一里昔有碑書一安且不可句

云是玄宗親筆今亦毀蝕宋張續詩云勁兵重鎮付狂奴
醵雀醵魚計自踈地入萬安知幾許却憐此邑始回車
志云元宗入蜀縣令造亭於北一里祇候土人呼為
接王亭遺址猶存北三里又有企僊亭乃車岩上昇處
宋師堯俞作記 寰宇記云縣西南十里有羅墳山羅
公遠隱居之處山下有洞號真人宮又有龍池山山上
有池池有伏石如龍蟠也 碑目有文鐸書龍洞仙踪
壁刻云太白山道人李洞賓以太平興國五年龍集庚

辰仲春乙丑朔越十二日奉勅賫內庫乳香二十斤詣靈
山相度仙洞焚燒初抵劍門邁老人之告闕次離巴岸
逢孤鶴以來迎及屆洞中睹雙童之出入已臻巖下見
玉輅之踪由又聆音樂淒清螺鈸竦越若非吾道神變
其孰能與於此乎勒於洞門以為他年會語張本真
誥云羅江大霍有洞臺中有五色隱芝陶註曰此洞為
南真及司命所任之處志云大霍山在縣西南十里羅
公遠修真處也上有羅真宮宋何彥真有記外志云大

霍山麓有丈餘磐石耕者每宿其上輒夢云接引佛上可卧耶驚以告寺僧掘其下果得像若天成不事雕琢者碑目有元人度琬東山寶明寺碑曰東山巔有景樂寺廼唐高宗神龍中所建宋大中祥符初改今名相傳十三尊者遊戲之所也在縣東偏一里古蹟志馬馳寺有井在山谷中四時水溢可以灌田近日忽枯涸土人浚之得龍首骨及大珠如卵光同水晶閃爍奪目衆競視之忽然雷震珠復墜於井中寰宇記白馬關

在羅江西南十里與鹿頭關相對志云山上平坦有小徑僅容車馬三國時營壘也其下名落鳳坡按鳳雛先生龐士元侍昭烈至此卒於流矢下其葬在鹿頭關桃花溪東岸墓右有龍洞葬時人見白馬自洞中逸出舊有白馬關巡司

彰明縣

寰宇記云縣治初在清廉鄉梁大同四年移於讓水鄉宋書范栢年掾潼人明帝語次問卿鄉土有貪泉否

栢年曰臣梁益間有廉遜水不聞有貪泉帝嘉之即拜
蜀郡太守按廉水在縣北平地出泉或云飲之生廉遜
故名 吳曾漫錄彰明縣清廉鄉有李白讀書堂後廢
為隴西院盖以太白系出隴西云院後有太白像 李
翰林墓碑云白本宗室子其先避地客蜀居蜀郡之彰
明太白生焉彰明邑有大小匡山大匡乃白讀書處圖經
梓州刺史于邵作李白碑在縣之寧梵寺三門下志云
碑在縣南二十里即白故宅 按匡山在縣北三十里後

改康山疑宋世避藝祖祖諱併杜詩而改之也杜甫寄
李白詩不見李生久佯狂真可哀世人皆欲殺吾意獨
憐才敏捷詩千首飄零酒一杯康山讀書處頭白早歸
來一云宋改匡山為翰林山方輿勝覽大匡又名戴
天山白集有訪戴天山道士詩犬吠水聲中桃花帶露
濃樹深時見鹿溪午不聞鐘野竹分青靄飛泉掛碧峰
無人知處所愁倚兩三松李膺益州記云自戴天山
向西連接為石磬山週三十里山有石室口方丈三尺

內有石牀四面高一丈有懸石如磬擊之聲聞數里下有流泉甘冽可掬寰宇記曰孟津山在縣東南一里自十八隴山而來西魏自讓水鄉移縣於孟津里是也三洞羣仙錄黃奉先移家入蜀隱太華山山盛牡丹奉先栽時盈籬春時花開望之如錦幃然在治北五里杜光庭錄異記綿州昌明縣竇圖山真人竇子明修道之所也西接長岡猶可通車馬東臨峭壁陡絕一隅自西僻至東峰石笋如圖兩崖中斷相去百餘丈躋

攀絕險人所不到其頂有天尊古宮不知建始年月古
仙曾笮繩橋以通登覽而絙笮朽絕已積數年里中諺
曰欲知修續者脚下自生毛如此相傳久矣咸通初山
下居人有毛意歡者幼知道常持誦五千言不輟口着
敝布褐日於市誦經乞酒醉而登山攀緣峭險以絕道
為橋山頂多白松樹以繩繫之橫亘中頂布板椽於繩
上士女善者隨而度焉行及其半動搖將墮而其底不
測莫敢俯視數年繩朽橋壞無復緝者咸通壬辰邑令

與賓客醺山登西峰展禮時毛師他游人有謂今日此峰側有小徑抱崖纔通人跡無所攀援意歡常從此去逾旬而出令疑其隱在穴中座上有廣陵郭頭陀者令請由徑往探之頭陀去久之始還驚眙不能語已曰此徑去約三十餘丈然後到一穴口纔三五尺下去平地猶數百尺穴內可坐十餘人中有巨木匱絨鎖極固其誦經處石面平滑有足膝痕經卷在焉不知意歡所之意歡有一妻一女每持燈椀度繩橋山側居人見之以

為非常山多毒蛇猛虎人莫敢獨往意歡雖夜歸亦
無所畏常有二鴉棲巖下客將至鴉必飛鳴意歡乃
整飾賓榻未畢客果至矣高僧傳云綿州城西北
四十里寶圖山梁大同中僧林所居也山北涪水之
陽素來無猿自林師棲託便有兩頭依林而住有初見
者云渡水來及後林出山門猿還洄渡如此非一年月
淹久孳乳產生乃至數十有時送林至龍門口佇望而
返方輿勝覽云猿門自縣北特起去縣二十里山多

猿免險固如門舊有猿門戍鄉嫗記云啼猿之地多蕨而縣於是有蕨山矣 郡國志云彰明縣蕨山有鍾乳穴十九又西岸有自然石塞其下流水上有一縣石似磬擊之有聲 寰宇記云彰明有附子山自松嶺關東來去縣四十里山出附子其水亦名附子水 勝覽云彰明縣有李膺墓西南去州四十里按膺涪城人梁時為益州大中正即撰益州記者

安縣

寰宇記云龍子山自漢州綿竹縣東入縣界亦謂之龍安山也志云縣北十里龍安山有蜀王秀避暑亭清泉修竹餘韻猶存矣元中統間升石泉軍為安州以神泉西昌為輔邑神泉即今神泉壩西昌即今花街鎮舊址尚可攷神泉者郡國志云縣西三十里有泉十四穴甘香異常痼疾飲之即差故曰神泉今有祠勝覽云銀線潭在神泉縣南山相傳白龍潛泳其間水面有銀線一痕以物撓之即不見波定如故也西昌舊名益

昌縣括地志云城西十里地名水柵有益昌縣者此矣
唐永淳年以利州有益昌故改為西昌縣取西昌山在
縣北山特起舊名馬鞍天寶六年勅為西昌山也

蜀中廣記卷九